

مبروك المدام حامل

مبروك المدام حامل

منى الكيال

ساخر

تصميم الغلاف : محمد عيد

رقم الإيداع : ٢٠١٤/٧٠٨٦

I.S.B.N: ٩٧٨-٩٧٧-٤٨٨-٢٩٣-٧

دار اكتب للنشر والتوزيع



الإدارة : ١٠ ش عبد الهادي الطحان من ش الشيخ منصور،

المرج الغربية، القاهرة .

المدير العام : يحيى هاشم

هاتف : ٠١١٤٤٥٥٢٥٥٧ - ٠١١٤٧٦٣٣٢٦٨

E – mail : daroktob1@yahoo.com

Facebook : دار اكتب للنشر والتوزيع

الطبعة الأولى ، ٢٠١٤م

جميع الحقوق محفوظة ©

دار اكتب للنشر والتوزيع

مبروك .. المدام حامل

افهم مراتك

أثناء الحمل والولادة

منى الكيال



دار اكتب للنشر والتوزيع

المقدمة

من لحظة ما يقولك الدكتور الجملة الشهيرة:

"مبروك... المدام حامل"

و تلاقي نفسك في كمية أحاسيس ومشاعر كثيرة بتحس بيها
ومش قادر تحددها بالضبط، بس هم قالولك إن الوقت ده تفرح فيه،
ولحد ما يجي البيبي وتشيله في ايدك، وتكتشف فجأة انك بقيت أب
ومستول عن نفس حية ترزق غير نفسك انت ومراتك، هاتأخذ وقت
عشان تستوعب ايه اللي بيحصل بالضبط.

أنا ربنا رزقني وجبت اتنين توأم، يعني ربنا رزقني بتوأم، وبعدين
بعد فترة كبيرة ربنا رزقني وجبت اتنين توأم تانيين.

لك أن تتخيل وتتصور وتسرح بخيالك في كل الحاجات اللي انا
عديت بيها وأنا حامل أو بعد الولادة، وكل اللي هتخيله وتتصوره
ده بقى اضربه في اتنين، عشان كل اللي انت هتخيله ده ما يجيش
نص الحقيقة أو اللي بنحس به احنا الستات الحوامل، عشان كده أنا
حييت أديكم انتو يا رجالة فكرة بسيطة
وطفيفة ولحة خفيفة عن اللي بتعدي
بيه كل ست وهي حامل.

وربنا يقدرني على فعل الخير، أنا جاية أهدي النفوس والله....

الكلام اللي هاقوله بيوضح اللي بتمر به الستات في كل حمل
وولادة، واللي انتو يا رجالة واخدينه شيء مسلم به وعادي

ويحصل من آلاف السنين. طب اسمع كده في قعدة من قعدات الستات وكل واحدة بتحكى عن ولادها، آه في احتمال تموت من الضحك... بس الاحتمال الأكبر ان شعرك يشيب او... الاتنين مع بعض في نفس ذات الوقت.

على العموم، انت عندك حق برده.. هو انت ايه اللي هيقعدك في قعدة ستات والا ايه اللي هيخليك تسمع عن ولادات الستات التانيين دول، خلينا في مراتك حبيبتك وحملها.

هو آه الستات بيحملوا ويولدوا من آلاف السنين، بس اللي
بتحس به كل واحدة وهي حامل وهي بتولد عمره ماكان عادي أبدا
على فكرة... عمره ما كان عادي والله... عاااااااااااا حرام عليكو
بقي... حرام عليكوووه هههههه ☹

المهم دلوقتي.. ازاى تتعامل مع مراتك، الأنثى الرقيقة اللطيفة
اللى ربنا اختارها لك عشان تعيشوا مع بعض هذه #التجربة.....

ايـــــــــــــــه شكلك كده مش عاجبك الأنثى الرقيقة اللطيفة دي، لاااااااا أرجوك اوعى تاخذ فكرة غلط عنا يا ستات، هي بس كل الحكاية ان فترة الحمل دي عابزك تكون:

۱- صبور

۲- حنین

۳- ذکی

علشان تعرف تتعامل مع مراتك حبيبتك اللطيفة بالطريقة
المناسبة ليها... بس كده.

الكتيب ده عشان يساعدك في كيفية التشغيل، والتعامل مع أنثى
الفيل، يوووه ماتلغبونيش بقى.. قصدي الأنثى اللطيفة الرقيقة
اللي هي مراتك وتعدّوا مع بعض الفترة دي بسلام ان شاء الله....
#ابقى_قابلي

تعرف لو فهمتها وفهمت هي بتحس بإيه، وعرفت ازاي تتعامل
معاها في الفترة دي صح، هتريجها ع الآاااخر، وانت كمان
هتستريح، د مدقني. طيب اقرا كده وشوف بنفسك....

أيون ده معناه إنك تقلب الصفحة ☺

قبل الولادة:

- النفس
- النوم
- الهي بي
- الجوع
- الكورة
- أوقات
- الولادة
- النوم بعد الولادة
- البيرونة
- اللي بعد البيرونة
- التيتينة
- الغيار
- زي الناس
- البتاع
- حاجات غريبة
- الموهبة الدفينة
- أول مرة

النفس

خير اللهم اجعله خير، قال ايه... اهوا اللي حواليا مش مكثيني،
وقال مناخيري مش بتجيلي هوا كفاية زمش عارفة اتنفس..
الحقونــــــــــــي

الحامل بتحس بكده في أوقات كتير ومختلفة أثناء الحمل. مثلاً وانا
لسة صاحبة من النوم الصبح، وبدون مقدمات أو أسباب، إذ فجأة
كده مافيش هوا كفاية وهبطانة وحاسة ابي داخجة وحاقع من طولي.

مثلاً: بعد ما أخلص أكل، أو لو عملت مجهود زيادة.. أو كتير
برده بدون مقدمات في عز ما أنا نائمة بالليل، قصدي وأنا باحاول أنام
يعني. ضيقة النفس دي من ضمن الأحاسيس الأساسية اللي بترافق
الحامل على طول وفي أوقات كتيرة.

عشان كده لما تلاقي مراتك مش مركزة ودهاها عمالة تلف في
كل الاتجاهات، ومناخيرها عملت شكل غريب كأنها قرفانة من
حضرتك، تبقى المدام داخجة وهبطانة وبتدور على هوا حوالياها،
ومناخيرها مش جايهاها هوا كفاية... واحتمال كبير برده تبقى
#قرفانة من حضرتك!!!

لأ أرجوك ما تزعلش مني أو من مراتك.. المشكلة مش في
رائحتك المنعشة على الدوام، المشكلة انما مش قادرة تشم أي روائح،
لأن الهوا اللي بيدخل مجرى التنفس مش كفاية، كمان حتشم روائح
مجهولة المصدر في الهوا ده؟؟؟!!!

طبعاً هتتحس انما اتخنقت ومش عارفة تتنفس، بغض النظر الروايح دي حلوة أو وحشة..... ها واخذ بالك.... أو وحشة.

لو الحامل نائمة ومش لاقية هوا، هتعمل ايه؟ بتضطر تقوم طبعاً بعد ما نامت بصعوبة كبيرة وبالغة وشديدة وكل الكلمات الجامدة (عشان حاحكيلكم ع النوم ده بعدين).. أنا كنت بأقوم أقعد شوية، وأهوي بأي حاجة لحد ما أحس اني عارفة أتنفس، وبعدين أبدأ رحلة النوم تاني.

بعد ما اخلص أكل، الهوا ييقل للحد الأدنى، وباهبط جامد وضربات قلبي سريعة سريعة، ومش عارفة آخذ نفسي بانتظام، ويمكن يصاحبه صداد طفيف...

- كل ده

- آه يا سيدي كل ده، انتو بس يا رجالة اللي مش حاسين بينا، وواخدين كل التعب ده شيء مسلم به، ولما يجيلكو صداد ولا برد تناموا في السرير ثلاث أيام.

انا..... حاشا وكلا.. مش متحاملة عليكم ولا حاجة، أنا بس باقول حقائق واقعية.. طب اسأل مراتك كده 😊!

أي حاجة بأعملها دلوقتي بتاخذ مني مجهود جامد، حتى لو كانت حاجة بسيطة.. لو باسرح شعري أو بألبس شراب (قال يعني حاطول ألبس شرايات تاني لحد ما أولد) أو كنت باساوي السرير، باسمع فيها صوت نفسي طالع نازل كإني لسة خارجة من ماتش كورة مع تونس في النهائي.

في مثل الانجليزي يقول:

"There is a first time for everything "

يعني: كل حاجة لها بداية، أو بالترجمة الحرفية: هناك مرة أولى لكل شيء. وبعد كده يبقى تصرف عادي، والإنسان بيتعود بعمله.

أنا بقى اكتشفت ان الحمل ينطبق عليه مثل عكسي تماما وعشان كده طورت المثل ليصبح: "هناك مرة أخيرة لكل شيء"، وده بيختلف من واحدة للتانية، وحسب ثقل البيبي وحسب هي في أي مرحلة من الحمل، وفي الغالب يبقى في الشهر الثالث من الثلث الثاني للحمل.. صعبة دي؟؟ طب اسمع يا سيدي:

الحمل ينقسم الى ثلاث أثلاث، أول ثلث: الشهر الأول والثاني والثالث، ثاني ثلث: الرابع والخامس والسادس، وثالث ثلث: السابع والثامن والتاسع، يعني #ثلاثة_مراحل_للحمل.

وكل مرحلة بتختلف فيها الحاجة اللي مش هتقدر تعملها تاني، وفي ستات بتقاوح وتعمل نفسها مافيهاش حاجة خالص، حلاوة روح يعني، وبعد كده تندم.

عشان كده أنا هنا بأوجه كلامي لكل واحدة عايزة تلعب اللعبة الخطيرة دي، أحسن لها كتير تبقى صريحة مع نفسها وتعرف بينها وبين نفسها ان حيكون هناك مرة أخيرة لحاجات كتير تقدر تعملها.

هناك مرة أخيرة اللي هتعرفي تلبسي لنفسك فيها الشراب، وبعد كده انسي.. هناك مرة أخيرة انك تعرفي توطي تجيبي حاجة من

الأرض لو حاجة وقعت، إلا بشوية إكروبات غريبة ومضرة ليكي وللجونين اللي في بطنك.. هناك مرة أخيرة إنك تشيلي الغسيل وتوديه البلكونة مثلاً.. هناك مرة أخيرة إنك تطلعي على كرسي وتحبي حاجة من فوق الرف.. واكيد هناك مرة أخيرة تعرفي تقصي فيها أظافر رجلك أثناء الحمل (روحي اعملي باديكير في الكوافير.. بروا على نفسيكو شوية ياخشيشي)

— مش عااااا جبك؟؟؟!!!!

طيب بدمتك امتي آخر مرة شبرقت على مراتك وقتلتها "خدي
يا حبيبتشي روجي الكوافير اعملي اللي انت عايزاه "

و بعدین هي يعني مراتك هاتعمل ايه في الكوافير وهي حامل،
آخرها تعمل حمام كريم وباديكير ايدين ورجلين عشان اي حاجة تانية
احتمال تبقى مضرة، أُمال بعد الولادة لما تروح تعمل برم وصبغة
وهاي لايت وباديكير ومانيكير وفاشيال، هاتقول لها ايه؟؟؟؟

— قطیعة تقطع الجواز واللى بیتجوزوه،،،،

لاااااا مش انت طبعًا يا جوزي يا حبيبي يا مهنيني، يا مشرقني.

(مش حد يقوللى انه هايقرأ الكلام ده!!!)

نرجع مرجوعنا بقى للهوا والنفس.. أهم حاجة لما تحس ان مراتك بدأت تتنفس بصعوبة هوي لها بأي حاجة. آه هويلها ينوبك فيها ثواب، فيها حاجة دي؟! على فكرة الأوكسجين بيتنقل في دمها للبيبي مش لها لوحدها، ومنه بتتنفس خلاياه علشان نمو مخ الجنين وكل أعضائه بصورة طبيعية، فاحرص على انها تكون دايماً بتتنفس كويس.

لو مراتك طالعة السلم، أو حتى راكبة الأسانسير، احتمال يجيلها هبوط ودوخة ونفسها يبقى رايح. خليك معاها وشيل منها أي حاجة هي شايلها.

لو أمك داعيالك، مراتك يبقى حملها في الشتا، ولو داعية عليك مراتك يبقى حملها في الصيف، عشان هتدفع كهرباء لما يتقطع وسطك، عشان في الصيف المروحة أو التكييف هيشغلوا ليل ونهار، عشان بس تعرف تتنفس. ده كمان ممكن تبقى محتاجة هوا زيادة على هوا التكييف أو المروحة.. هوا مخصوص قدام مناخيرها.

اقلبوا الصفحة بقى احسن الهوا هنا بقى قليل قوي يا ختشيبي 😊

النوم

النوم، وما أدراك ما النوم.. في الشهور الثلاثة الأولى بانام، واصحى ناسية اني حامل ولا كأن فيه أي حاجة.. وأول ما أقوم من على السرير، أفكر ثاني ان في حاجة في بطني غريبة، اه يا ولاد ده انا حامل والمفروض اخلي بالي على نفسي شوية، وابتدي بقي امشي مشية الحامل عشان اتقمص الدور شوية ☺.

في الشهور الثلاثة اللي بعدهم، كل يوم يبقى أصعب من الثاني، وكل ليلة تجيلي هواجس عن البيهات وشكلهم، كل واحد وصوابه وايديه ورجليه ووشه ☺

وابداً افكر الحاجات اللي عملتها كلها من أول الحمل، وأي كريمات استخدمتها، وأي دوا أخذته (تقريباً #باتلكك) ويزيد القلق شوية.. وبعدين استعيز ربنا وأحاول أنام.

طب الواحدة مننا تعمل ايه في الأرق الليالي ده؟ وبعدين كل يوم النفس يبقى أصعب #، يعني تخيل انك:

مش عارف تاخذ نفسك

- ومش عارف تتقلب براحتك في النوم

كمان هواجس وأرق

طب تنام ازاي بزمتك؟؟

طيب نلف بقى ع الجنب الشمال.. ايه نسيو؟ احنا نمنا بس على
الجنب اليمين، لسة هنتقلب ونروح الجنب الشمال.

آجي ألى من الجنب اليمين عشان أروح للجنب الشمال
واتخلص من الاوجاع اللي مالهش تفسير، واللي انا حاساها، وعشان
احط حد للهواجس وانام بقى، ألاقى قرصة غريبة جدا في رجلي..
قرصة مش طبيعية كأن حد حط السيخ المحمي في صرصور....
رجلي....

آآآآآآآآآآ .. صرخة مكتومة عشان مااصحيش زوجي الحبيب
واللي نايم تعبان وشقيان، وصوت غريب بيطلع مني واوعى تسألني
مين.

لآآآآآ آوعوا تفهموني غلط لسة ماروحتش ع الجنب الشمال.. ده
أنا بس نمت على ظهري، وبآخذ نفسي، وبعدين عشان ألف ع
الجنب الشمال ما تنسوش.. آخذ معايا المخدات... آه مخدات... جمع
يعني، هو انا ما قتللكوش؟؟؟

تعالوا أما أقولكو، قريت برده في مواقع على النت متخصصة
لمساعدة المرأة الحامل، عشان تعدي بمرحلة الحمل بطريقة أسهل، ان
المرأة الحامل تنام على مخدة مرتفعة شوية عشان النفس والحموضة
والذي منه، وأفضل وضع للنوم هو على الجنب، ويكون في مخدة بين
ركبتيها وياريت لو المخدة اللي هاتنام عليها تكون على شكل موزة،
عشان:

- تسند عليها راسها

—أخيراً هنام.

- لااااااااااااااااااااا، عايضة أعمل بي بي ☹

جنبها، وبعدين تقوم... تقوم تقعد بس ماتفهمنيش غلط.. وبعدين
تبقى تفكر في الوقوف، وساعتها كل حاجة بتبقى مؤلمة مؤلمة مؤلمة،
وكل حاجة بتوجعها مع بعض في نفس ذات الوقت.. حس بيها شوية
وابقى قوم ساعدها يكرمك ربنا.

يا سلام لو جالها نداء الطبيعة ده وهي خارجة برة البيت ☺

بص يا سيدي، لازم تعرف انها مش هاتدخل أي مكان وخلاص،
لأنها مش هينفع تغامر في وضعها ده، فلازم تدور معاها على مكان
ينفع بمجد، وتدور بسرعة عشان ماتمكننش عليك باقي الخروج، أو
تضطروا تروحوا تحبطوا فجأة على باب ناس قرايكم ما شوفتهم مش
من ثلاث سنين، وتسألوهم عن أخبار الحمام بتاعهم.

لما تكون سايق العربية وسرحان في ملكوت الله، ومراتك الحامل
فجأة تقولك اركن هنا، نفذ على طول واوعى تتناقش معاها، لأنه
مش من مصلحتك ولا من مصلحة العربية انك تتناقش معاها أو
تحاول تغير رأيها، أو حتى تديها بدائل ثانية، ده لو بتحبها ومقدر
قيمتها كويس، وما تقدرش تستغنى عنها وخايف عليها.. قصدي...
العربية طبعًا ☺

عشان اديك لمحة بسيطة خفيفة زي ما اتفقنا، حاول تفكر معايا
ايه الوضع لو انت سايق على طريق من الطرق اللي هي مش وسط
البلد، والطريق زحمة والعربات مابتمشي ومعاك أطفالك فلذات
أكبادك الاتنين، وعابزين يدخلوا الحمام وعمالين يزنوا. قدامك أكثر
من حل، انك مثلاً تستنى لما الدنيا تمشي وتدور على اقرب محطة

بترين وتوديعهم هناك، دي على أقل أقل تقدير فيها نص ساعة، أو تغامر وتصبرهم عقبال ما تروح البيت، وانت وحظك بقى وما تزعلش ولا تشتكي من اللي حيحصل للعربية حبيبتك.

عندك حل كمان.. انك تقفل العربية وتزل تعدي الشارع تروح محطة البترين اللي على الناحية الثانية من الشارع، ما هي الدنيا واقفة واقفة وما تعرفش هتقف لحد امتى واستحمل بقى شوية كلام وألفاظ خارجة من اللي راكبين عربياتهم حواليك.

وده اللي اضطرت تعمله واحدة صاحبتى، لأنها قعدت في العربية ساعة ونص في نفس مكانها، لأن فيه ناس كانت قاطعة الطريق واولادها خلاص مش قادرين يستحملوا وهي كمان، فغامرت واستحملت الكلام والألفاظ عشان خاطر أولادها، وأول ماعدت الشارع الناحية الثانية....ها.....Guess what.....

برافو، الطريق مشي وعربيتها وقفت في نص الشارع ورجعت بسرعة وما دخلتهمش الحمام.... ما تسألنيش بقى عن العربية أخبرها ايه...:)

مش باقولك نداء الطبيعة لازم الواحد يلبيه في أي وقت وأحياناً في أي مكان.

واحدة صاحبتى تانية قررت تدخل واحد من محلات الفاست فود، وده طبعا الحل الأمثل في وسط الشارع، وربنا يخليلنا ماكدونالدز وكنتاكي وكل شركة أمريكانا في حماماتهم بس اللي موجودة على قارعة الطريق في كل مكان، لأن الأكل عندهم ده موضوع تاني.

المهم، قررت تدخل ماكدونالدز وهي قاب قوسين أو أدنى من نقطة
اللا رجعة (ماتساليش ايه اللي انا كتبته ده لأن هي ماتتوصفش غير
كده حفاظًا على سلامة عين وأنف القارئ) وبعد ما وصلت للحمام،
واحد من العاملين قال لها: آسف ممنوع الدخول

هي: ليه

هو: النور مقطوع وممنوع حد يدخل الحمام عندنا والنور مقطوع

هي: —————

و طبعا الندم كان من نصيب مين؟؟؟

برافو..... أحد العاملين في محلات ماكدونالدز ☺

طيب بالراحة بس علشان تفهم كل ده ليه.. دلوقت البيبي ده
مش له فضلات؟ بتروح فين؟ يا حرام الست مراتك اللي بتأخذها منه
في دمها وتخلص منها بكلاويها، ده بيخليها محتاجة تتخلص كثير (بي
بي دوبل يعني)

كمان البيبي ده جوة - خصوصا في آخر أول ٣ شهور وآخر
ثالث ٣ شهور يبقى ضاغط على مثانة البول مخليها ما تستحملش
تشيل كمية كبيرة ولازم تفضي.. ده غير ان هرمونات الحمل
بتضعف الصمام يا سيد.. فاهم يعني ايه بتضعف الصمام؟ يعني مش
هتعرف تحوش نفسها كثير.. كله يوسع السكة

الجوع

اوعوا تفتكروا ان الجوع اللي بنحس به ده زي الجوع العادي
اللي حضرتك بنحس به لما تكون جعان... لأ طبعاً، الجوع اللي
بنحس به حاجة تانية خالص، أقولك يا سيدي:

كنت باحس ان في حاجة في معدتي بتاكلها، أو ان معدتي بتاكل
نفسها وفيه حاجة غريبة بتشدني للأرض، وبأحس اني بادوخ فجأة.
يعني الجاذبية الأرضية في الوقت ده بتبقى في أعلى المستويات.
ولتلخيص الموضوع احب أقولكم الجملة الشهيرة في كل الأفلام
والمسلسلات العربي والأجنبي كمان:

- حاسة اني داخلة ونفسي غامة عليا

- مبروك يا افندم... المدام حامل.

كده على طول دي مفهومة، لازم ساعتها أكل أي حاجة، يعني
أحط في معدتي أي حاجة تاكلها احسن ما تاكل نفسها، أي حاجة،
أي حاجة فعلاً، فمش مهم انا عايزة أكل ايه دلوقتي أو موجود ايه في
الثلاجة، أو عايزة أكل حادق أو حلو، في الحقيقة ما كنتش بألحق
اوصل للمرحلة دي، اللي هي مرحلة اني اختار بين أنواع الأكل، أي
عيش فاضي أو لقمة ناشفة مش مهم، المهم ان في حاجة تترل معدتي.

لأن أي حاجة تنفع في الوقت ده.. وعلى فكرة يعني كمية الاكل
في المرة الواحدة مش كثيرة ف.... لو سمحتو... ماحدش يقول على

الترجيع المتين...

فأنصحك يعني لو لقيت بقها اتعوج بطريقة غريبة وعمل شكل يخوف، ده... ببساطة لأن اللي جاي يخوف فعلاً، فلو ده حصل قدامك في أي وقت أوعى تستنى... وسع على طول من قدامها وأوعى تقف في وشها في الوقت ده.

مثلاً وهي صاحية من النوم، زي أي بني آدمه أو بني آدم طبيعي هيدخل الحمام، وهتلاقي الأصوات الطبيعية اللي بتصدر في موقف زي ده، إنما كمان هتلاقي صوت غريب مصاحب للأصوات اللي فانت وهو صوت ايه.....؟ برافو، صوت الأوع المتين

دي حاجة خارجة عن إرادتها على فكرة.. أنا أشرحلك:

بتحس ان في حاجة مش مفهومة بتحصل في بطنها (طبعاً غير انها حامل ودي حاجة هي فهمها) بتحس انها مش مضبوطة وان زي ما يكون في حاجة بتشد لسانها لبرة وانها بتدوخ فجأة والدنيا بتلف بيها وانها يمكن عندها اسهال... وانها يمكن حتقع على الأرض.

كل الحاجات دي بتحسها في نفس الوقت، وبتحصل في نص دقيقة مثلاً، فكل اللي بتفكر فيه انها بتبقى مختارة تروح الحمام،

ولا تفرد نفسها شوية على السرير،

ولا... تروح ع الحمام احسن ترجع،

ولا... تروح ع السرير عشان مش هتلتق توصل الحمام،

ثم فجأة

..أوع...

في أي حنة بقى ع السراحة، ع الباب، على السرير أو على
حضرتك.... برده ده احتمال كبير... مش قلتك وسع من
قدامها... 😊

المشكلة بقى لو حصلت الحكاية دي وهي برة البيت في مكان عام
مثلاً، يعني مرة حصلت معايا الحكاية دي وأنا في فرح، وكنا قاعدين
قرييين من السماعات، مش قرييين قوي يعني بس قرييين كفاية اننا
نسمعها بكامل قوانا العقلية.. المهم يا سيدي، كنت بدأت أدخل في
دور الاكتئاب المعهود بتاع الحامل (حاحكيلكم عليه بعدين) و كنت
لسة مخلصنة امتحاناي فقلت لنفسي " أوك، واي نوت، لتس جو "
"Ok, why not , let's go "

فرحنا الفرح، معارف جوزي في الشغل، قعدنا وانبسطنا، وبعد ما
خلصنا البوفيه والديزرت وكله تمام، بدأت الموسيقى تجمد قوي مش
عارفة ليه، أو يمكن هي كانت جامدة من الأول بس أنا اللي كنت
بقاوح، المهم ان اللي في بطني بقى اعترضوا على الصوت العالي ده،
وقرروا ان ده اكثر مما ينبغي، وبدأت بطني توجعني والخبط بتاع
الأغاني كأنه يخبط في بطني وتعبت...

#أحاسيس غريبة.... بس كنت برده بآاوح.

كنت باقول لنفسي " أنا حلوة أهه زي باقي الناس اللي قاعدة
مافايش حاجة" .. وبعدين... إذ فجأة حسيت اني مش هاقدر
استحمل اكر من كده.

قلت لجوزي اني هاطلع برة شوية استريح من الصوت العالي،
وحسيت بكل أحاسيس الترجيع السابق ذكرها.

كان فيه استراحة وانتريه برة القاعة بس بعيد شوية، وكنت رايحة
ناحيتها، لكني ايقنت فجأة اني مش هاقدر اوصلها، فقلت أروح
الحمام اقرب.

دخلت الحمام لقيته زحمة، وكأي حمام شيك في أي قاعة شيك
بتاعة أفراح، مليون بنات بيحطوا مكياج ومليان كليتكس ومية من
كل ناحية، اتضايقت وقرفت ومالقيتش مكان ادخل اصلًا، مع اني
كنت في الشهر الرابع، بس مهما كانت الحمامات دي واسعة
هتفضل برده ضيقة لحد في حالة زي حالي..

لفيت وقلت اطلع برة في الهوا شوية، وكل ده والأحاسيس اللي
انا قلتها عمالة تزيد وتوضح وتختلط مع بعضها، مجرد ما طلعت برة
الحمام لقيت نفسي فجأة بـ... أأأأأأأأأأأأأأأأ ع ع ع ع

كل اللي عرفت أعمله إني أوجه نفسي للجنب شوية، وعينكم
ماتشوف الا النور بقى.... الطرحة والهدوم والبنطلون والشراب
والجزمة والكروسي والسجادة والمرآة،
كروسي..... الحمد لله لقيت كروسي...
أما أقعد أريح بقى.

بقيت قاعدة بأبص على المنظر وأنا لا حول لي ولا قوة.. طب
أعمل ايه بس، أعمل ايه بدمتكوا ☺

نااااعاااممم، ماکنش آکل....

مين قال كده؟.. أنا سمعت حد قال كده.. آمال أنا رائحة الفرح
ليه؟ آآآآ.... قصدي يعني عادي يعني ما كل الناس رائحة الفرح
عشان تاكل.... يوووه.... قصدي يعني كل اللي في الفرح كان
بياكل عادي يعني ماتحبكوهاش كده.. هي هي هي 😊

اللي اقصده ان فيه ستات بتاخذ الغثيان على محمل الجدة انها تبقى نفسها غامة عليها فما تاكلش أصلًا. بدمتكو ينفع كده يعني؟ طيب وبطنها اللي بتاكل نفسها تعمل فيها ايه؟ ماهي لازم تاكل عشان اللي في بطنها وعشان ماتدوخش وتقع من طولها. شوفتو بقى ان انا كنت واخدة بالي من نفسي، لأني كنت باحس بالغثيان فاقوم ماصة نص لمونة واكل عادي برده ☺.

المهم بقى نرجع مرجوعنا للأكل، فيه ستات وهي حامل نفسها ببتقى "مضوضة" خالص وماتاكلش طول الحمل غير فتات، ربنا يجعلها من حظك ومن نصيبك يابني، مانا عارفة انتو يا رجاله بتفكروا ازاي.

بس المشكلة الوحيدة بقي ان الجونين هيبقى صغير وضعيف ولما يتزل هيبقى برده صغير وضعيف وعنده الصفراء، ويمكن يدخل الحصانة زي في حملي الأول، عشان كده أنا اتعلمت في الحمل الثاني. مش بأقولك مدوباهم أربعة.. فعشان كده أنا بانصح كل واحدة حامل انها تهتم بأكلها وتحافظ على صديقتها " الليمونة " جنبها دائماً

على الكومدينو وفي المطبخ وع الترابيزة وفي شنتتها وان شاء الله
كله حيقي تماااام.

عامة، بغض النظر عن الغثيان والليمونة والترجيع، بالنسبة
للجوع... أنا كنت بأجوع كل ساعتين أو ثلاث ساعات بالكثير ولما
قلت كده للدكتور بتاعي في الحمل الأولاني، كان رده غريب جدًا
ومافهمتش، قاللي: "تعالى كليني أحسن " أما الدكتورة في الحمل
الثاني قالتلي: "كلي بس الحاجات المفيدة وبلاش اللي بيتخن "

طب مانا بأعمل كده برده

الحاجات اللي بتخن نوو نوو نوووو

اقعدوا بقى بالعافية، أنا رايحة آكل...

آآآآ... أصلي اتغديت بدري النهارده.....)

الكورة

الواحدة الحامل تدريجيًا بتحول لمستودع كور كـيـر .

عايزاك تحس بيها، أو بس تتخيل مشاعرها شوية.. الهدوم بتضيق عليها واحدة واحدة، واللي كانت بتحب تلبسه أو لسة شارياه ونفسها تلبسه، أو اللي عاجبها ونفسها تشتريه مش بيعجي فيها أصلًا.

كل يوم الصبح تبص في المراية تلاقي حاجة جديدة منتفخة وبتحول تدريجيًا لكورة..

عينيها منتفخة وشبه اللي لسة مخلص ماتش ملاكمة.

مناخيرها شكلها غريب وفرشحت... أيون زي ما قرئت كده " فرشحت " ده لفظ معروف جدًا عند الحوامل.

ها... احنا اتفقنا على ايه.. لازم تفهم مراتك أثناء الحمل وتحس بيها.. ودلوقتي لازم تفهم يعني ايه مناخيرها فرشحت، يعني فردت للجنيين وألوظت لفوق وبقت عاملة شبه كورة البينج بونج و.. و.. حتلاحظ أنها بتتغير كل يوم عن اليوم اللي قبله.

ايه... مش عاجبك ولا ايه!!!، الله يرحم لما كان عندك برد وغمت علي السرير أسبوع متواصل عطس وبرد وكحة ورشح.. حد كلمك ساعتها ولا قالك بص في المراية والا شوف مناخيرك ازاي زادت اتنين كيلو على حين غرة!!!!... فوت بقي فوت.

زي الكورة وشكلها شكل الكورة مش ده بس اللي مآثر على
نفسيتها، ولكن الحقيقة المرة اللي لازم تواجه نفسها بيها، واللي كل
الناس دلوقتي بقت عارفاها وشايفاه، هو انها كمان بتمشي زي
البطة، وتاكل زي البطة، وتنام وتقوم زي البطة...

يعني بمنتهى التأكيد أصبحت المدام كورة مبططة ☹️....

مش قادرة تطلع السلم، مش قادرة تقعد على الكرسي، ولا تقوم
من على السرير، ومكسوفة تقولك ساعدي في كل مرة. ولو ربنا
كرمكو ومراتك كانت حامل في توأم، ماتخليهاش تتكلم خالص ولا
تطلب حاجة عشان كل التعب البدني أو النفسي بيكون بالضعف،
اسألني أنا مدوباهم اتنين وربنا يكون في عونكم

المطلوب منك في آخر ثلاث شهور انك تساعدنا تقوم من على
الكنبة، ساعدها تقوم من على السرير، ساعدها وهي طالعة السلم،
ساعدها وهي بتقعد في العربية.. وخليك صبور معاها، حاول تعلي
مواصفات الجنتل مان شوية في فترة الحمل (و بعد كده ابقى وطيهها
تاني عادي خالص أنا عارفة انت خايف لحسن تاخذ على كده) أصل
هي برده شائلة حاجة مهمة بالنسبة لك، صح والا ايه ☺️

ماتخليهاش توطي تشيل حاجات من الأرض، ساعدها في الأكل
الحلو اللي هي بتطبخهولك، أو جيبيلها حاجة تاكلها وهي نائمة على
السرير مش قادرة تقوم، ساعدها في شوية مواعين برده مافيههاش
حاجة، ما أنا قلت لك هي مش عارفة تقعد زي الناس، ولا عارفة
تنام على أي جنب، ما بالك بالواقفة بقي !!!

ولو مراتك حسست انها عايزة تنام في أي وقت من نهار أو ليل
اديهها فرصتها، ووفر لها الراحة عشان تقوم مفوقة وكويسة وقادرة
تعمل باقي الحاجات.

راعي نفسيتها شويتين في الوقت ده عشان أوقات كثير الحامل
بتحس بحاجات... غريبة ومريبة ودماغها بتشتغل في كل
اتجاه.....

حاجات زي ايه؟؟؟؟؟

—

—

—

اقلب الصفحة وأنا أقولك ☺

أوقات....

أوقات... الواحدة الحامل بتحس بحاجات غريبة قوي وماهاش
تفسير واضح

وقات تحس انها عايزة تعيط أو فجأة تلاقي الدموع بتزل من عينيها
من غير أي سبب ومن غير مقدمات ف... تضطر تصعب عليها
نفسها وتستمر في العياط لحد ما تلاقي جوزها قدامها، تقوم متخافقة
معاه ماهو مافيش حد غيره.... هو السبب... في ناس حاتقولك
هرمونات الحمل بتزود المية في الجسم فيزيد ضغط المخ يعمل اكتئاب
ويمكن كوابيس و... هلاوس!....

س لا أنا بيتهيألي برده ان هو السبب #استقصاء

هي اهي اهيسبي

لو اتقور وسألها: "مالك بس؟؟؟"

هتلاقيها تصب عليه جام غضبها وتجييله من القديم والجديد وو..
مامته واخواته واللي بيعملوه معاها وهي مستحمله كل ده وساکتة،
فأحسن حل في موقف زي ده طبطب عليها وخدها في حضنك
وقولها: "معلش، معلش هانت خلاص، بس انت استحملي شوية"،

وأي كلام تقول له لك في وقت زي ده ولا تسمعه أصلًا وهز رأسك زي المفكر العظيم ورد عليها وقولها: "عندك حق... معلى استحملي شوية وحقك عليا يا ستي"

جوزي بدأ يفهم الموضوع ده متأخر شوية، يعني على الشهر السادس أو السابع، وعشان كده كان مرة بيحاول ياخدني على قد عقلي بمنتهى الحماس، فكان بينا هذا الحوار:

أنا: انت مش قلت حنخرج النهارده، وكل مرة تتأخر وبعدين
ماخرجش

هو: معلى غصب عنى والله

أنا: كل مرة تقوللي غصب عني، غصب عني

هو: طيب تحي نخرج دلوقتي

أنا: نخرج نروح فين الساعة ١٠ بالليل وبعدين خلاص أنا تعبانة وعائزة أناام

هو : معلى هاعوضها لك مرة ثانية إن شاء الله

أنا: ماهو انا اللي غلطانة اصلاً.....

هو: صح يا حبيبتى

انا: صح!!!... كمان بتقوللي صح... انت عايز تجنني؟؟؟!!!

هو: آآ...قصدي... قصدي انا اللي غلطان يعني، انت بس
هذي نفسك ونامي... نامي وانت تستريحين خااااالص



انا:

- أوقات... في التلت الأخير من الحمل، في الشهور السابع والثامن والتاسع، هتلاقي أصوات بتصدر عن مراتك انت مش متعود عليها ومن كل الاتجاهات، بس دي يعني... ليها تفسيرات علمية واضحة ومحددة المصدر، فأرجوك، لو سمحت تغاضى عنها وخليك جنتل مان، اعمل نفسك مش واخد بالك لأنها في وضع دلوقتي تقل فيه السيطرة على ذاتها ومخرجاتها في أي اتجاه عادي يعني، موقف إنساني منك.

- أوقات... الواحدة الحامل فجأة كل حاجة توجعها مع بعض وفي نفس ذات الوقت... بطنها، ظهرها، رجلها، جنبها، نفسوياتها وحاجات تانية كتير... وتقعّد تتأوه شوية من الألم، فإذا يتبادر الى ذهن زوجها الحبيب أن يتعاطف معها ويتوحد مع مشاكلها ويحس بيها فيسألها السؤال العبقري اللوزعي: مالك؟؟؟

يعني حيكون ماها يعني.....؟

هي عامة حاجات كتير بتوجعها في أوقات كتير، بس مرات بيبقى الألم مش قادرة تستحمله فجأة وكل حاجة مع بعض، وبعدين هترد عليك تقوللك ايه والا ايه؟؟؟؟

ترد تقوللك مثلاً: عندي مغص وظهري بيوجعني، وحاسة دماغي ثقيلة وضغطي مش مطبوط، ونفسي رايح وجني بيوجعني من امبارح

والحموضة هتموتي ورجليا مشككة شوية، والواد ابنك عمال يرفض
زي الحصان اللي داخل سيق (أو في حالي دي الترفيص من كل
ناحية...)؟؟!!!!

عشان كده أنا بانصح كل واحدة لو جوزها قرر مرة يتعاطف
معها بهذه الطريقة انها ترد عليه الرد الوحيد اللي يفسرله كل ده:

" مافيش يا حبيبي، باين عليا حامل...."، حتى لو في الشهر الثامن
عادي برده فكره لو مش واحد باله!!!!!!!!!!!!

أوقات ... أوقات الحامل بيجيلها اكتاب:

اكتاب حقيقي مرضي يعني، بس هو بيبقى مؤقت وبتبقى مش
عارفة مالها، زهقانة من رتم الحياة، زهقانة من انها مش قادرة تعمل
حاجة حتى لو عايزة، زهقانة من الحاجات اللي متعوده تعملها
وبتسلي بيها نفسها، زهقانة من التليفزيون، زهقانة من الرغي في
التليفون ومش عايزة تكلم حد، زهقانة من القراءة أو من الانترنت
لو دي هوايتها مثلاً، أو اي هواية تانية متعوده تعملها، مش عايزة
تروح لحد ولا حتى عايزة تخرج من البيت ولو بتشتغل بتبقى مش
عايزة تكلم حد وتروح وتيجي من الشغل زي الروبوت عشان
مضطرة بس.

الحالة دي ممكن تيجي لناس كتير وحتى مش مرتبطة بالحمل بس،
لكن مع الحمل والتعب والاجهاد اللي بتحس بيهم الحامل الوضع

يبقى اسوأ كتييسير وخصوصاً وهي مضطرة كل يوم تبص في المراية
وتقابل الكائن الغريب اللي كل يوم بتحول له.

وطبعاً الحامل مضطرة في الوقت ده انها ايه؟؟؟ يلا يا شاطرين
ها؟؟؟ صح، برافو عليكو، بديتو تفهمونا،،،

مافيش قدامها غير انها تصعب عليها نفسها وتعيط واول
ماتشوفك، تتخانق معاك عشان مافيش غيرك.... انت السبب.....):

قدر اللي هي حاسة بيه وبتمر بيه، واعرف انها مرحلة مؤقتة،
وطبعاً لو لقيتها بتخانق معاك من غير سبب اديها فرصتها، عادي
يعني خناقة وتعدي وحاول تخرجها في اي مكان تتمشوا فيه شوية،
وادعيها بقى تعدي الفترة دي على خير وتقوم بالسلامة.

- أوقات... الحامل تفكر ان هي دي حياتها وانها هتفضل كده
على طول تعبانة وشكلها غريب وزيادة في الاكتئاب تفكر في نفسها
بعد الولادة وانها خلاص حياتها اللي كانت تعرفها قبل الحمل
والولادة انتهت، واتحولت خلاص لست البيت المدعبله حتى لو
بتشتغل تلاقي الفكرة بتروح وتيجي على دماغها وتصر على انها
تصرفها وترجع تاني.

والحقيقة ان حياتها بتتغير فعلاً بس بتتغير بشكل تاني يعني بتطور
عن اللي كانت تعرفه وماينفعش تقارن لأن مافيش مقارنة لأن نظرة
واحدة في عين بنتك أو ابنك وهو بيضحكالك تساوي كل لحظة تعب

تعبتيها أو لسة هتتعبها وده مش معناه انك انتهيتي واتغيرتي إلى الأبد
لأ، ده معناه انك اتغير في حياتك حاجات بقت أحلى، نضجتي وبقيتي
مسئولة عن نفس غير نفسك وصدقيني المسؤولية دي هتحييها أكثر ما
بتحيي حياتك قبل الحمل، أسأليني أنا مدوباهم أربعة 😊

الولادة:

كلا كيت أول مرة

كنت مستتية الولادة بفارغ الصبر، لأني خلاص مش قادرة أعمل حاجة والدكتور قاللي ماتعمليش أي حاجة في الدنيا غير انك تتقلبي من الكنية دي للكنية دي للسريـر ده، بس كده لحد ما تولدي. وده طبعا لأن الحامل في توأم بيبقى عندها ريسك عالي انها تولد قبل التاسع، يعني في السابع أو الثامن حسب التساهيل.

وأنا نائمة في أمان الله، إذ فجأة كده حسيت إن في إزازة مية اتكبت عليا وأنا نائمة جدًا ورايحة في النوم، طب أصحى بقى والا أعمل مش واخدة بالي؟؟؟

قررت أقوم وأركز شوية هو اللي بيحصل ده بمجد؟ أصلي حامل يا ولاد وباين عليا بأولد والا ايه؟؟!!!!

– ألو أبوة يا حبيبي وانت عامل ايه تمام الشغل كويس طيب، أصل أنا زي ما يكون بأولد كده تقدر تيجي دلوقتي؟؟؟

– ألو أبوة يا ماما باين عليا بأولد....

الطلق بدأ

هوه هوه هيه هيه هيه هوه هوه هوه

(تمرينات نفس للتقليل من ألم الطلق)

مش عارفة جوزي جه ازاي من الشغل في عشر دقائق هو وماما،
وبعدين اخدنا الشنطة ونزلنا، بدأت أحسب الطلق بيحي كل قد ايه
لقيته كل عشر دقائق: هوو هوو هيه هيه هيه هوو هوو

ووصلنا المستشفى في نص ساعة، دخلت الأوضة، غيرت ما بين
الطلق والطلق وقعدت مستتية الدكتور، جت الممرضة تسمع نبض
البييهات، واطمنت الحمد لله،

الطلق شغال: هوو هوو هيه هيه هيه

قالولي استريح ع السرير لسة شوية ما تقلقيش، الوضع كان
صعب لأن مافيش أي وضع مريح ساعة الطلق لا القعدة ولا النوم ع
الضهر ولا النوم ع الجنب ولا أي وضع.. وبدأ الطلق يجمد، ويبقى
كل خمس دقائق

هوو هوو هيه هيه هوو هوو هيه هيه

بدت أشد في الترابيزة اللي جنب السرير واتشعلق فيها، جوزي
حاول يكلمني وبعدين عرف ان ده مش في مصلحته حاليًا...

هوو هوو هوو هيه هيه هيه

— يالا يا مدام على العمليات....

— هو الدكتور جه؟؟

— لأ

—
—
—

حد بيضربني بالألم..... يالا يا مدام انت ولدتي خلاص قومي بقي
هه..... ولدت خلاص....بالراحة كده باشوف بطني يايدي
لقيتها لسة كبيرة، هي بتضحك عليا ولا ايه؟؟!!!!
فتحت عيني بالعافية... لقيت محمد بيصلي ومبتسم وماما بتبصلي
ومبتسمة، عرفت ساعتها ان انا ولدت وكل حاجة تمام
اتكلمت بصعوبة وسألت على البسيهات ومحمد طمني.

الولادة... كلايت ثاني مرة:

المرة دي أنا اللي حددت ميعاد الولادة مع الدكتورة من غير
طلق ولا حاجة...

ياللا يا أولاد أنا رايحة أولد تعالوا معايا، ده انتو حاتنبسطوا
آآآوي.

زي مانكون طالعين رحلة كلنا.. كنت باحاول أضحك وأبين
للولاد اني مش خايفة ولا مرعوبة ولا قلقانة من الولادة ولا على
البيبهات ولا حاجة وعمالة أراجع في دماغي هدوم البيبهات اللي في
الشنطة، والكوفرات والبطاطين والولاد يبصولي بيحاولوا يعرفوا
مشاعري عاملة ازاي وانا عمالة أقولهم صوروا كل حاجة،
وماتنسوش تصوروا فيديو كمان، عايزة على قد مأقدر أطمئنهم
وأطمئن جوزي وماما ان أنا مش قلقانة وان احنا رايحين مشوار
عادي.

جودي: مامي هي البيبهات حيطلعوهم ازاي؟؟؟

عمر: حيطلعوهم من بقل؟؟؟؟

أنا: هو أنا حارجعهم يا حبيبي!!! لأ يا جوجو حيعملولي فتحة
صغونة في بطي يطلعوا منها البيبهات وبعدين يقفلوها تاني على
طول

عمر: حتوجعك؟؟؟

أنا: أكيد يا حبيبي، بس أنا مش حابقي حاسة بحاجة عشان حابقي
واحدة بنج، بعد كده ممكن توجعني لما أفوق بقى.

جودي: وايه البنج ده أصلاً؟

أنا: ده دوا كده مخدر بياخدوه اللي بيعملوا أي عملية عشان ما
يجسوش بأي حاجة خالص، يعني أنا كل اللي عليا أدخل أوضة
العمليات وآخد البنج وأطلع ألاقى البيهات جم ان شاء الله.

جودي: عايزة آجي معاكي جوة العمليات أشوف البيهات

عمر: وأنا كمان

أنا: ماينفعش يا حبابي، ممنوع، انتو تستنوا برة وهم حيطلعولكم
البيهات على طول.

أنا: محمد... أمانة عليك أول ما أفوق من البنج طمني على
البيهات، على كل حاجة فيهم على ايديهم ورجليهم وشكلهم
وقوللي الحقيقة، أوعى تخبي عليا حاجة ها... قوللي على طول من
غير ما أسأل الله يخليك.

محمد: ان شاء الله.... حاضر ما تخافيش.... خليكى انت بس في
الولادة.

عمر: يلا يا مامي عشان أصورك وانت نازلة من البيت.

بأحاول أبتسم وقلبي عمال يدق....دق دق دق

دخلت المستشفى برجلي اليمين جوزي معايا ومامتي وأولادي
التوأم الكبير، دخلت الأوضة اللي كنت متفرجة عليها، حطينا
الحاجة، ألدنا ع الدكتور، قالولنا لسة ماجاتش، تبولت في الأوضة
شوية ولسة حاقعد ع السرير لقيت الممرضة جت وبتقوللي يلا يا
مدام عشان تغيري.

دخلت الحمام بصيت في المرايا بالصدفة لقيت واحدة غريبة مش
عارفاها، ايه ده مين دي، واستحضرني في هذا الموقف العظيم قول
الشاعر العظيم اللي انا مش عارفة اسمه حاليًا...

بابص لروحي فجأة لقيتني... لقيتني كبرت فجأة كبرت ونزلت
دمعتي ☹

قوليلي ايه يا مرايتي، قوليلي ايه حكايتي وآخر قصتي ☹

لقيت عينيا وارمة وكل عين اتنين كيلو، ومناخير.. تقريبًا أربعة
كيلو! قلت للممرضة: ايه ده شكلي متغير أوي أنا مش عارفاني انا
مش كده على فكرة انا كنت حلوة والله.

قالتلي: معلش كله حيروح بعد الولادة وحترجعي مزة تاني،
ماتقلقيش.

غيرت وقعدت ع السرير مستتية، وكل اللي معايا بيصولي
وكلهم قلقانين بيحاولوا يبينوا اهم مافيهمش حاجة، وأنا كمان
بابصلهم وأبتسم.

مستنين نسمع نبض البيبهات، مانا عارفة من المرة اللي فاتت.

جت الممرضة ومعها الجهاز اللي بيسمع نبض البيبي، حطت
السماعة على بطني، وسمعت نبض واحد من البيبهات وبعدين شالت
السماعة وحطيتها بعديها بخطوة، على أساس ان ده مكان البيبي
التاني، ومش عارفة بصراحة ده كسل منها والا جهل بمكان البيبي
التاني المفروض يكون فين... أصل هما مش مترصين ورا بعض صف
واحد، المهم ما سمعتش غير دقة ضعيفة، قائلتي ده ممكن يكون نفس
البيبي الأول، قتلها أصل هو مش هنا أصلاً. ماهو السونار كان مبين
انهم فوق بعض في بطني مش جنب بعض، فقتلتها، تحاول تسمع تحت
مكان البيبي الأول فجربت لقت النبض طبيعي والحمد لله، وقد
ذهلت ذهول شديد وقالت لي ايه ده ايه اللي عرفك مكانه؟؟؟؟!!!

عشان مافيش نفس ولا وقت أحكي كل ده فقتلتها..... قلب
الأم!!!

جت الممرضة أخيراً وقالت لي يلا بينا، قتلها يلا....

الولاد بصولي وبدأوا يتفعلوا مع الموقف، ومحمد قاللي ربنا معاكي
ان شاء الله وتقومي بالسلامة، وماما ابتسمتلي وقائلتي ربنا معاكي،
وأنا بقى نزل عليا النشاط والحيوية يلا بينا.... (أو هكذا كنت
بادعي)

مزيج من المشاعر الكثيرة... الخوف من العملية، ويا ترى
حاشوف عيالي وجوزي وأهلي تاني، يا ترى حاطلع من العملية..
ونفضت كل ده وحاولت انتهج أسلوب إيجابي وأستدعي مشاعر

دخلت أوضة العمليات: ريجة أنا عارفها كويس لأني عملت
كذا عملية قبل كده (والحمد لله)، أنوار قوية، أصوات بتكلم،
ولقيت السرير....

اللحظة الفاصلة،

جت ممرضه تانية وسألتني، حتاخدي بنج كلي ولا بنج نصفي؟؟

ردیت: هي الدكتورۃ ماجاتش

المرضة لأجت... ها حتاخدي بنج كلي ولا نصفي

لأول وهلة جالي احساس انه... طب لما الدكتور هنا بتسأليني ليه وأنا مالي كلي ولا نصفي، بس لما سألتني تاني فهمت ان القرار ده راجعلي أنا ولازم أنا اللي آخذ القرار

(يا ماما! بقي انتو لسة حتسألوني واخذ قرارات وأفكر، أنا مش عايزة أفكر في حاجة أنا عايزة أغمض عيني وافتحها ألاقي اللي بيهاش في ايدي... بس كده، ادوني بنج كلي،)

کلیہ کی

الحمد لله اني ركزت شوية برغم اني كنت عاملة زي المشدوهة...

أو... المشبوهة....

أو..... المهبوثة

أو.... المنكوشة

هو في الحقيقة ماكتش عامله زي، لأ... أنا كنت كل دول في بعض، أصل أنا كده ست فري انترستنج من كل النواحي #نهاهاهاها

ركزت شوية وافكرت ان البنج النصفى ده ببقى حقنة بتتاخذ
 فى أسفل الظهر، فقلت لنفسى أنا مش مستحيلة، خلينى فى السيف
 سايد بقى.

طلعت على سرير العمليات وجه دكتور البنج والمرضات رايعين جابين حواليه، والنور ضارب في عيني، جت الممرضة عشان تحطلي الكانيولا، وبما اني متمرسه في الموضوع ده، فحببت أدلو بدلوي، قتلها على فكرة الايد الثانية فيها العروق ظاهرة أكثر، عملت نفسها مش سمعاني، فقتلتها الكلام تاني، وتقريباً نرفزها فقاتلتني: طيب طيب مالكيش دعوة احنا عايزين الايد دي،

آتاري فيه مكان على السرير عشان الإيد من الناحية دي اللي حيقى فيها البنج تبقى مفرودة ومافيش مكان في السرير ناحية الإيد الثانية....

بطلوا تفتوا بقى وسيبوا الناس تشوف شغلها #الفتي_المستمر

دكتور البنج بيعجي يوصل البنج بالكانيولا ويبدأ يسأل المريض
كام سؤال زي اسمك ايه، ويعيد السؤال تاني، ويمكن يسأل عندك
كام سنة، وكل مرة باستغرب من السؤال لأسباب كتير:

هو الدكتور دخل كذا أوضة عمليات ومش عارف أنا مين فيهم
بالظبط؟؟!!!

ولا الدكتور بعد ما بيدخل أوضة العمليات بيدون عنده اسم
المريض والحالة؟؟ (لأ بعيدة دي، لازم يكون عارف هو فين ويعمل
ايه)

اه يبقى الدكتور مش واثق تمامًا في اللي حواليه وبيحب يتأكد
بنفسه من الاسم من المريض شخصيًا.

بس كده قلة في المهنية والكفاءة بتاعة الدكتور والمستشفى (بس
الغريبة ان كذا دكتور في كذا مستشفى مختلفة في كذا موقف مختلف
ويسألوا بنفس الطريقة!!!!!!)

على العموم اتفقت مع جودي وعمر بعد ما حكيتلهم عن البنج
والدكتور وأسئلته الغريبة انه أول ما يسألني اسمك ايه، حارد وأقوله:

اسمي عبد الحميد.

الغريبة ان الدكتور ده ماسألنيش اي حاجة خالص، لأنه كان
مشغول بيكلم الممرضة في الاجازات وماما فهمتي ان دكتور البنج

موووو سسسسساااااااااااا کن هاتوووي مسکن

أنا: الله يسلمك، انا فايقة ايه قولهم يجيولي مسكن

ماما برده بتضري بالقلم (حاجة غريبة): حمد لله على سلامتک يا
منى فوقی بقي عشان تشوفي الولاد

أنا: آآي أنا فافقة اهه من غير ضرب، بس قوليلهم يبيولي مسكن
يا ماما الله يخليكي

ماما: حاضر يا بنتي حاضر

اللي ييفكروا ان اللي بتولد قيصري مش بتحس بآلام الوضع
يسجوا يشوفوا الوضع اللي أنا فيه دلوقتي

أنا جربت الاثنين آلام الوضع والطلق والولادة الطبيعية، والولادة القيصرية

أرجوكي، يا كل واحدة مفكرة ان القيصري أسهل راجعي نفسك تاني، ليه بقى أقولك يا ستي:

في حالة الولادة الطبيعية: الطلق وآلام الوضع تنتهي بالولادة وتبثدي الآلام تخف تدريجيًا وتلتئم الجروح تدريجيًا وطبيعيًا والسر الرباني سبحانه الله واللي ثبت علميًا ان الرضاعة الطبيعية وإدراة اللبن ييساعد على التئام جروح الولادة بشكل طبيعي وبسرعة.

مین؟؟!!.... ولاد خالتي جاین اهلًا وسهلاً،

مَبْرُوكٌ مَبْرُوكٌ أَلْفٌ مَبْرُوكٌ وَحَمْدُ اللَّهِ عِوَالِ السَّلَامَةِ،

– الله يبارك فيكم يا جماعة، ماتقعدوا شوية ده كلام تمشوا على طول كده...

(اَنَام بقی اَبوس رِجَلکو)

– يلا يا بابي خد بقى الولاد عشان يروحوا عشان الوقت اتأخر
تلاقهم عايزين يناموا والا حاجة.

— لأ يا مامي عايزين نقعد معاكي انت والبييهات

- لا يا حبيتي اليبهات مش معايا وبعدين يا دوب تروحوا تناموا (وأنا انام) وتيجوا بكرة الصبح على طول ها، يلا يا حبيتي مستياكو الصبح بدري، يلا بقي تصبحوا على خير.

الحمد لله كله روح أنام بقي.... يا سلام... وايه ده كمان ممكن
أوطي النور شوية... هو ده المطلوب.... ايوة بقي

خخخخخخخخ

توردروردن توردردن

ہہ مین؟

الحضانة يا فندم: نطلعك بيبي B دلوقتي والا نديله بيبرونة؟

(اهييسى الأمومة نقحت عليا أوييسى، نأجل النوم شوية
بقي)

النوم بعد الولادة

ما عرفوش وما شفتهوش وبقيت اسمع عنه من الأهل والأحبة
والخلان فقط لا غير، ونصيحة مني لك انسي الموضوع ده أفضل

انسي انك تعرفي تنامي وتتغطي وتتدفي زي الناس، جازر تتغطي
اه، لكن مش هتلتحي توصلي لمرحلة الدفا.. وده وعد مني بذلك.

أول ما تولدي، وانت في المستشفى، تقولي يا سلام ولدت الحمد
لله، واديني باعرف اتنفس اه، احمدك يا رب يبقى هاعرف انام بقي.

و طبعًا ده من سادس المستحيلات.. أحكيك :

أول يومين ثلاثة بعد الولادة بيقوا حاجة....

لأ هو أول اسبوع بعد الولادة بيبقى...

حاجة قميئة....

حاجة قدرة....

حاجة قاتلة....

مش عارفة أوصفه بالتحديد، بس هي حاجة كده بالقاف أنا
متأكدة.

بتبقي تعبانة ومش نايمة، وكل حاجة بتوجعك من غير مبرر، ولو
حاجة بطلت توجعك بتلاقي حاجة تانية بدأت توجعك بدالها،

ومعدتك بتأخذ وقت عقبال ما تتظبط وتكتشف انها رجعت مكانها،
وكل حاجة تانية رجعت لحجمها الطبيعي، وما فيش حاجة بتضغط
على حاجة.

لو والددة طبعي يبقى البواسير حتشغل، ولو والددة قيصري يبقى
الجرح حيشد عليكي، وكمان "بونس" عليه البواسير، وهنيالك بقي
الإمساك والإسهال، يا ستي ماتدقيش بقي أيهما يبدأ أولاً وأيهما
حيستمر معاكي وقت أطول، كلها تفاهات، تفاهات!!!! ات (٢٥)
اهيئتي اهيئ اهيئ

(ملحوظة وتنبيه هام ونصيحة مخلصه من قلبي لكل أم رايحة تولد،
لازم تجيبه من مستلزمات بعد الولادة: أول يومين لازم الأم تستخدم
"برست شيلد" ده مهم جداً، وتسألني عليه أي صيدلية عشان تعرفي
تتعاملني مع الموقف، والله أنا رأيي يتوزع في المستشفيات لكل أم
بتولد)

كل واحدة تعرفيها فجأة بتبقى خيرة وتديكي نصايح غريبة، لأ
وكمان تفضل كل واحدة تقولك ايه اللي بتعمله ده مش كده،
وتبدأ بقي النصائح والتوجيهات، وكإن هم لو في مكانك ولسة
والدين، أو عندهم توأم زيك حيعرفوا يعملوا أحسن من اللي
بتعمله.. مانتني عارفة بقي الشعب المصري يموت في النصايح
والتوجيهات.

و طبعاً أول اسبوع ده هو أكثر وقت يمكن تلاقي فيه أي مساعدة
ممكنة، بعد كده كله بيروح في حال سبيله، حتى جوزك اللي هو أبو

الولاد، اللي هو يعتبر في مقام والدهم برده، كله فص ملح وداب..
طب ماما..... طب حماتي..... طب حد من اخواتي..... انت
والولاد وربنا معاكم.

بعد التوأم الأولاني، وماما عملت اللي عليها وأكثر، قالتلي لو
جبتي ولاد تاني حارميهملك من الشباك. فكان لزاماً عليّ اني اخذ
بالي من نفسي ومن ولادي، وبلاش أتقل على الست الوالدة أكثر من
كده (أنا خايقة على عيالي بصراحة).

البيبي بيبقى عايز ياكل كل ساعتين أو ثلاثة بالكثير، فلو انت
عرفتي تظبطي مواعيد نومك وصحيانك مع البيبي تبقي انت بنت
جدعة.

أما بالنسبة بقى للتوأم: فيلم ترضيع البيرونة (الجزء الأول)

عندك يا ستي كل حاجة مضروبة في اثنين زي ماتفقنا، يعني كل
بيبي بيحتاج ياكل كل ساعتين ل ثلاث ساعات، حلو.... طيب،
احسبي معايا:

هتبدئي معاهم بالبيرونة مع الرضاعة الطبيعية، واوعي يراودك
خيالك انك ما ترضعيش طبيعي، لأن دي حاجة مش بتاعتك ده
حاجة معينة ربنا باعتها للبيبي، وبتوصله عن طريقك، وانت بس
الرسال فلو سمحتي ماتفكريش تحرميه من اللي ربنا باعتهوله، وده فيه
فايدة كبيرة جدًا للبيبي وكمان ليكي انت، ومش حادخل في
التفاصيل الصحية لفايدة الرضاعة أكثر من كده؛ لو لسة مش
عارفاها تقدرتي تدوري عليها ع انت.

نرجع بقى لطريقة الرضاعة:

ممکن ترضعي واحد طبيعي وترضعي الثاني البيرونة، والعكس بقى الرضعة الجاية.. أو ممکن تبدئي بالرضاعة الطبيعي، وتكملي وراها البيرونة لكل بيبي، ده حسب ماتحسي انك حتقدري تعمليه، وحسب البيبهات استجابتهم ايه معاكي.

و ماتخلش حد يتدخل في طريقة ترضيعك ليهم اللي انت حاتختارها، ممکن تسمعي نصايحهم آه، وتستعيني بمساعدتهم، لكن القرار الأخير لازم يكون بتاعك انت، حتى لو جوزك أو مامتك، لأنك في الآخر انت اللي حتواجهي الواقع لوحدة، ف لازم تكوني عارفة انت بتعملي ايه بالظبط. وأهم حاجة يكون فيه نظام محدد تمشي عليه والبيبهات يمشوا عليه عشان يريحوكي.

طبعا هترضعي البيرونة في ساعة الا ربع أو ساعة، حسب البيبي وحسب البيرونة المناسبة ليه، أوك.. وخلي بالك من فتحة البيرونة ماتبقاش واسعة عشان مايشرقش ولا ضيقة زيادة عن اللزوم عشان يعرف يرضع.

لو بيبي A معاد أكله مثلا الساعة ١٢، يبقى بيبي A هيخلص الساعة واحدة تقريبا، وتمسكي بيبي B برده ياخذ ساعة، يبقى هتخلصيه الساعة ٢

يبقى بيبي A حينام من الساعة ١ للساعة ٣ ونص، وبيبي B حينام من ٢ ل ٤ ونص، يبقى انت الفرصة الوحيدة المتاحة ليكي انك تنامي من ٢ ل ٤ ونص، يعني ساعتين ونص فقط، ده على

اعتبار ان مافيش حد فيهم حيصحي في النص ولا حيجيلوا مغص ولا
حيعيط ولا أي حاجة، وده طبعا مش حقيقي، ده بس من كتر
الحرمان من النوم بيتصورلك كده، لأنهم حيصحوا ويعيطوا ويحيلهم
مغص ومش حتعرفي تنامي ساعتين على بعض غير كل كام يوم مرة
وبالصدفة البحتة.

الطريقة دي بتكرر كل ساعتين تلاتة على مدار الـ ٢٤ ساعة،
وعشان كده بانصح أمهات التوائم أنهم ينسوا النوم العادي بتاع
زمان ده، وانسي انك تنامي اكتر من ثلاث ساعات أقصى حاجة،
ودي ممكن تحصلك صدفة سعيدة أو حد يعطف عليك ويأخذ الولاد
منك وانت تنامي شوية.

أكثر حاجة ممكن تناميها في الثلاث شهور الأولى ساعتين
متواصلين، الثلاث شهور اللي بعدهم ممكن تنامي ثلاث ساعات، لحد
ما يكملوا سنة. أقصى حاجة ممكن تناميها أربع ساعات متواصلين، ده
لو قلبك جابك يعني.

لأني لما كنت بأنام ساعتين أو أكثر، أقوم مخضوضة وأقعد أركز
شوية وأفكر، هو احنا غنا امتي، هما الولاد معايا في الأوضة ولا برة
مع الشعب اللي برة، ولما يكونوا نايمين معايا في الأوضة أقوم ابص
عليهم واسمع نفسهم وأناكد طبعا اني باسمع نفسين مختلفين عن بعض
واستنى شوية كده.... لسة باتأكد لسة باتأكد أهه... وبعدين اكون
صحيت بقي وفقت و... خلاص مافيش نوم.

أو أكون لسة حاطاهم بإيدي في السرير واحد ورا الثاني، وأتخض
أول ما اسمع صوت بيبي بيعيط من بعيد، طب مانتي لسة متطمنة
عليهم، طب حتى اسمعي كده نفسهم # شيزوفرينيا

قاعدة تغيري وترضعي وتأكلي وتكرعي وتيمي، وترجعي ثاني تغيري
وترضعي وتأكلي وتكرعي وتيمي، بس شطارتك بقى انك تطوري
مهارة مسك الرمحوت أثناء الترضيع أو التكريع بسرعة في الفترة
الأولانية، عشان تقللي من كمية الالهيارات.... تاتت اللي هي
الالهيارات العصبية دي.... هو أنا ما قتللكيش؟؟؟

عايزاكي يكون صدرك رحب أول شهر بعد الولادة، وعندك
صبر كبير وتقبلي الوضع بحدووووووء، وتقبلي الالهيارات العصبية
بصدر رحب وبسلاسة منقطعة النظر.

حيجيلك اكتئاب ما بعد الولادة، عادي بتحصل لأحسن
الأمهات.

الالهيارات العصبية حيجيلك حيجيلك من قلة النوم وكثرة الطلبات
اللي وراكي، عادي جدًا برده تقبله بصدر رحب وما ترمش اللوم
على أي حد، لأنه مافيش حد يقدر يعمل أكثر من كده ومافيش حد
حيساعد أكثر من كده، ولا حد يعرف يعمل أفضل من اللي بيتعمل
ده، وكله حيمثل فيلم #الهروب الكبيير.

الشيكولاتة لها مفعول سحري ضد الاكتئاب والمود اللي مش
متظبط، دلعي نفسك بشيكولاتاية من وقت للتاني، ماحنا لازم ندلع
نفسنا يا بنتي مانستناش حد يدلعا. أنا عايزة كله يدلع نفسه، هي آه
مش في مصلحة الريجيم بس عايزاكي تكوني واحدة الريجيم ده
بالراحة، وعايزاكي مرنة ومطاطة وإيلاستيكية بمعنى: النهارده مودي
مش متظبط أو زهقانة أو مكتبة أو أي حاجة تانية يبقى فيه حل

سريع وسهل وهو الشيكولاتة، لحد بقي ما ربنا يحلها من عنده. آمال
يعني نفضل مكتتين، مع الأخذ في الاعتبار ان الوضع حيفضل زي
ماهو مافيش تغيير؟؟؟

يبقى لازم التغيير ده يبقى نابع من جواكي انت، ما تستنيش حد
يغير مودك أو يحسن نفسك لأنك #حتسني_كتيــــر!!!

عشان كده عايزاكي تتقبلي الافكار والعياط والشهفة بصدر
رحب، عاديــــــــي خالص، بس حاولي مايكونش قدام
البسيهات، وبعد كده قومي اغسلي وشك واشربي شوية مياه وكمللي
مهامك اللي ربنا أوكلها لك واعرفي انك بتعملي حاجة ماحدش
غيرك يقدر عليها أو يعرف يعملها (على فكرة المياه مهمة جدًا
لواحدة بتعمل مجهود زيك، ومهمة جدًا لواحدة بترضع، ومهمة جدًا
لواحدة عايزة تعمل ريجيم #قال_يعني #ابقي_قابليني)

الساعة تلاثة وأربعة بالليل، لما تبقي قاعدة ترضعي لوحذك والدنيا
حواليكي ساكتة، افتكري ان ربنا قريب منك قوي في الوقت ده..
كلميه وقوليله انك محتاجة المساعدة قوي.. ربنا كريم فوق ما
تتخيلي، وحتلاقيه يدملك سكينه في قلبك وصر، انت في أعز الحاجة
ليهم.

اللي بعد البيرونة

وطالما باتكلم عالبيرونة، يبقى لازم اتكلم كمان عن "التكريع"...
وآسفة على هذا اللفظ المقزز، ولكن هي دي الحقيقة العارية، واللي
هي أقل حاجة في التقريز اللي حتشوفه الأم بعد كده. اللفظ ده
مصاحب لكل أم وأب... (ما هو لازم بقى يساعد شوية، يكرع
البيبي بس... صعبة دي).

الحقيقة دي حتبقي عايشة فيها ليل ونهار على الأقل أول ست
لسبع شهور، لحد ما يبدأوا ياكلوا (الأكل ده الجزء الثاني من فيلم "
ترضيع البيرونة") لأن التكريع بعد البيرونة ده مهم جدًا، ولازم
البيبي يتكرع ويطلع الهوا اللي في معدته، عشان بيعمل له غازات
وانتفاخات، اللي بتؤدي الى مغص فظيع و"صريخ" و"زن"... وده اللي
احنا الأمهات بنحاول نتجنبه طول الوقت.

لازم تعرفي وضعية مناسبة لابنك أو بنتك يتكرع فيها، يعني مثلاً
ممكن البيبي يكون بيتكرع وهو على الكتف، أو وهو على ايدك قاعد
نص قعدة لأن غلط طبعا على البيبي الصغير نقعده، علشان ظهره
وعضمه لسة طري جدًا وعشان سلسلة ظهره ما تتقوسش.

لازم بعد كل رضعة يتكرع، اقعدي بقى كرعي فيه يدينا ويديلك
طولة العمر، لأنه ممكن ما يتكرعش لمدة نص ساعة أو ساعة، حسب
صبرك يعني، وبعدين إذ فجأة يتكرع، أو ممكن يتكرع في أول خمس

دقايق تكريعة خفيفة وانت مش سامعة، وتفضلي بقى تطبلي على
ظهره للصبح. أو جازيز ترهقي وتكوني تعبانة، فتقرري تغامري وتحطيه
عشان ينام ويبقى يتكرع براحته، في الحالة دي يمكن يرجع أو يقشط
كثير، أو يشرق، أو يفضل يوأوأ من كتر المغص، وانت اللي عليكي
انك تقعدى بقى تعالجي المغص ده في الآخر، أو يمكن يكون من النوع
اللي مش بيتكرع عادي زي الناس، وفي الحالة دي لازم تستعيني
بنوع من الأدوية بيبقى عامل زي الجليل وهو عبارة عن مجموعة من
الأعشاب وهي بتسهل الهضم وتهدئ الطفل.

(ملحوظة هامة: أول فترة من عمر الببى تبقى معدته لسة بتتهيا
للأكل عشان وهو في بطن الأم كان بياكل بطريقة تانية والأمعاء
بتاعته بتوسع فكده كده حاتلاقي أمغاص وأوجاع وصرخات كتيرة
وأصوات غريبة وهو نايم عادي، ده أول فترة بس، يمكن الشهر
الأولاني، وبرده لازم تتابعي مع الدكتور.)

عايزاكي كده تشغلي خيالك، وزودي وقت التكرع على وقت
أكل البيرونة، احسي كده وقوليلي ممكن تنامي قد ايه.. كل قد
ايه؟؟؟؟

ده بجد على فكرة.. وكل واحدة نفسها في توأم لازم تراجع
نفسها كويس وتبقى صادقة مع نفسها، وانها تقدر تستحمل الحرمان
من النوم ييجي سنة كده أو سنتين لحد ما تفتلمي... يعني... انت
وكرم ربنا عليكي.

الجزء الثاني: فيلم الأكل بعد الست شهور الأولانية:

مش حاقولك عليه.. حاسيك انت تكتشفيه بنفسك. انت
عايزاني أحرقلك كل المفاجآت 😊

التيتينة

أو في أقوال أخرى السكاته. بغض النظر عن فايدها أو ضررها بالنسبة للبيبي، حتنفعك في الأول تسكتي حد من البيبهات، في الوقت اللي تكوين فيه ماسكة الثاني بترضعيه أو بتغيريله، وهكذا بالتبادل. فلو واحدة من ذوات الدم البارد اللي ايديها في الماية الباردة قالتلك:

ايه ده.. ليه كده.. بلاش التيتينة أنا ولادي كلهم مربياهم من غير تيتينة...

أنصحك ساعتها انك تمسكي أقرب.... تيتينة وتخطيها في... بقها لأن اللي ينفع مع حد مش شرط ينفع مع الثاني، وأي حاجة تقدري تستخدموها عشان تساعدك ماتتردديش. وعلى فكرة كله بيتغير في الآخر مع الوقت، وانت المتحكمة في كل شيء، بمعنى ان أي حد من البيبهات يعود على حاجة ولقيتها غلط ممكن تغيريها بعد كده بالتدريج وبالصبر، بس تكويني منتبهة ايه الغلط وايه الصح، وايه المفيد وايه المضر، وأي حاجة اللي تبقى مفيدة ولحد امتي.

يعني مثلاً التيتينة كانت مفيدة بالنسبة لي لمدة ثلاث شهور، وبعد كده لقيتهم ارتبطوا بها اكثر من اللازم، وكانت كل ما تقع من يؤهم وهم نايين يعيطوا ولازم أقوم من النوم احطها لهم في يؤهم وانا تاني، فوصلت معايا لمرحلة انها بدل ما تساعدني بقت بتمثل عبـ عليا، عشان كده بطلت أديهاهم يومين، وكله رجع تمام.

الغيار

بدون مقدمات كده حتغيري ثلاث أو أربع مرات لكل بيبي،
يعني ست سبع مرات غيار في اليوم، وده أقل حاجة يعني عشان ده
المعدل الطبيعي. ممكن يبقى أكثر من كده في أوقات الاسهال، أو
ممكن البيبي ما يعملش مرتين في يوم ويجي اليوم اللي بعده يعمل ثلاث
مرات أو أكثر عادي برده.

في أول شهر، الدكتور قال لي ممكن البيبي يقعد ما يعملش ثلاث
أيام أو يعمل عشر مرات في اليوم عادي.

ممكن الكيكي بتاعه يبقى لونه أصفر أو أخضر أو بني أو أسود أو
أي لون، عادي برده، ده في الفترة الأولانية بس، عشان قلنا ان
معدته بتتعود على الهضم. لكن بعد كده، لما تنتظم معدته، لازم
تلاحظي لون الكيكي كي بتاعه عشان لو اتغير يبقى بردان أو عيان
بطريقة ما وانت مش عارفة...

- ايه ده هو أنا حابص في الكيكي كمان وأنا باغير؟؟؟؟!!!!

- ايه ده... هو انت حاتبصي بس؟؟؟؟!!!!

ده انت حاتبقي انت والكيكي حاجة واحدة!!!

ده الكيكي حايقى مصاحب ليكي في كل مكان وريحته مالحة
عليكي دنيك لحد ماتتعودي عليها، ولو قاعدة في أي مكان حتى لو
مامعكيش البيسيهات حتشمي ريحة الكيكي برده #شيزوفرينيا

أهم حاجة انك تستخدمي مشمع تغيري عليه (فيه مشمع مربع
متبطن مخصوص للغيار معروف وتجييه من أي حته) عشان ممكن
وانت بتغيري إذ يتبادر الى ذهن البيبي انه ينفس عن مكنوناته وممكن
التنفس ده يجي من أي حته، عشان كده استخدمي المشمع عشان
تكوني جاهزة لأي تنفس وتقللي من الحسائر على قدر الإمكان،
لأنك مهما عملتي لازم حيكون فيه خسائر جانبية.

فتقبلي الأمر ايه؟... بصدر رحب.. وايه كمان؟....
بهديوووو برافو يا بنات شاطرين..لأنك لو اتوترتي وصرختي
ونطيتي مثلاً من مكانك أو حاولتي تسدي مصدر التنفس بأي
حاجة.....

أولاً حتقطعي سرسوب أفكاره،

ثانياً البيبي حيتوتر ويصرخ هو كمان،

ثالثاً لو كل مرة حتعلمي كده يبقى في الآخر حيجيلك هس هس
من كتر التسريبات... مش قلتك #ربنا_شفيك

زي الناس؟؟؟

تفتكري ممكن تعيشي حياتك وتاكلي وتشربي وتعملي زي
الناس؟؟؟

حياتك في الفترة دي بتبقى عبارة عن فترات متقطعة، بتعيشيها
بين كل رضة ورضعة، اللي هي بتصفصف في الآخر على ساعة
كووول كام ساعة.

وحياتك اللي هي على فترات متقطعة دي، بتبقى بتجري فيها من
الأوضة للمطبخ للحمام للبلكونة للأوضة للمطبخ وهكذا...
وماتنيسش تغلي ماية كل شوية في الكتل، ولما تدق تحطياها في
الترمس، وتبقي تستخدمياها للرضعة اللي جاية، يلا بسرعة اعلمي
الأكل، واغسلي الهدوم المنقوعة، اجري بسرعة لمي الغسيل قبل ما
الدنيا ما تمطر، اغلي البيرونات، ادخلي الحمام بسرعة، عشان لو
صحوا مش حاتعرفي تتحركي من مكانك قبل ساعتين، طفي ع
البيرونات بقى اوعي تنسيهم، وطفي ع الرز، شغلي الغسالة، اجري
جيبيلك موزة وخليها معاكي دلوقتي حتاكلها.. بس.. ايه ده...
روحي الأول شوفي مين صحي وبيعط #يالهوي

حاولي على قد ما تقدر في الفترات المتقطعة دي انك تاكلي
فيها وتدخللي الحمام لو قدرتي، وخليهم من أولوياتك، لأن الأكل
والحمام في الفترة الأولانية بيقوا من سابع المستحيلات، وممكن

تاكلي #إبان مانت بتغلي البيرونات وتغليهم أو #إبان مانت
بترضعي البيهات لو افكرتي تحبي الأكل جنبك (أي أكل ☺) و لو
تترقي تحلي البيبي في وضع بحيث انك ينفع تستخدمي ايد واحدة في
ترضيعه والايد الثانية تبقى فاضية تقدري تستخدموها، والحمد لله
السميع العليم المهارة دي أنا طورنا ووصلتها بعد بيجي شهر ونص أو
شهرين، هو وضع معين كده اللي عايزة تعرفه تبقى تسألني على
انفراد عشان مش حينفع أقوله هنا #أسرار.

و مش حاقولك بقي حاولي تسرحي شعرك، لأ.. عشان أنا واقعية
وده يعتبر من ثامن المستحيلات، لكن حاقولك حاولي ماتركيزي في
الشكل قوي احنا دلوقتي مركزين على المضمون، لأن الفترة دي هي
فترة الاحتياجات الأساسية للإنسان في "هرم ماسلو للاحتياجات"
وموضوع تسريح الشعر ده في مرحلة متقدمة من هرم ماسلو. يعني
لو سرحتي مرتين ثلاثة في الشهر بقي شاطرة، ممكن تعملي "برم"،
بس فيه ناس حطرتني منه عشان الرضاعة، على العموم انت برده
حتظمني قوي لما تلاقي الأمهات العادية اللي هم عندهم بيبي واحد
متغلين به وتلاقيها تقولك مش عارفة أسرح شعري خالص مش لاقية
وقت، حتعرفي ساعتها إنك ماشية مضبوط. (على فكرة أنا قلت
التسريح بس.. عشان الاستحمام ده شيء تاني ومهم برده في الفترة
الأولانية، ويعتبر من الأساسيات) #النظافة من الإيمان بقي

نرجع بقي للأكل عشان الأكل بالنسبة لك مهم جدًا في الفترة
دي، لكن تاكلي زي الناس دي بقي... مش حنحلم، ارجعي لأرض

من أي حد) بس أوقات حتغطسي في بير عميق أول ما تحطي دماغك
على المخدة.

مرة من ذات المرات، بعد عدة شهور من الولادة، كنت عايزة
أنام ومش قادرة.. عاملة زي البيت الآيل للسقوط، وكنت حاسة اني
هبطااااا هبطانة وبديت أترنح فعلاً. سبت التوأم الصغيرين مع التوأم
الكبار، بعد ما أكلتهم وقلت للكبار: مامي عايزة تنام شوية يا ولاد
ولو اخواتكو الصغيرين عيطوا اديلهم بيرونة الميا ولاعبوهم شوية.
نمت الحمد لله ما يقرب من ساعة ونص.. وأنا كنت في أمس الحاجة
اني أغمض جفني بس، وكنت قايمة مروووووقة، ولقيتني بغني:

(البط يقوم فرحان من النوم يغطس ويعوم وهات يا لعب 😊...)

البتاع:

ظهر البتاع في حياتي بشكل كبير، وبدأ يفرض نفسه بقوة، وده طبعاً من الولادة والرضاعة وقلّة الأكل المفيد في الأوقات المفروضة، والجهد الجامد اللي بتعمله كل أم

المهم ان في الوقت ده كل حاجة عندي بقت بتاع أو بتاعة.. يعني
مثلاً:

- يا جودي هاتيلي البتاعة دي
- يا جوجو ممكن تفسليلنا حبة بتاع من اللي بابا جاييه
- يا عمر الحق البتاع حيقع
- حد يجيللي بتاع عشان عايزة اغير له بسرعة
- يا سي الحق البتاع حيشده يقع على دماغه،
البتاع ده في منتهى الخطورة
- يابني شيل البتاع ده حرام عليكو حطه مكانه حبيجي حد
دلوقتي يشدلي البتاع منه يقوم واقع كله ع الأرض
- البتاع باظ حرام عليكو مش قتللكو ماتسيهوش مفتوح طول
الليل مافيش حد قادر يدوس على البتاع بتاعه يطفيه
- عايزة اغلي البتوع عشان معاد اكلهم جه
- البتاعة دي ماتنفعش على فكرة ضيقة قوي مش عارف يرضع
خالص لازم أوسعه البتاعة بتاعتها أو أجيئه بتاعة جديدة

- لأ... طيب بص ممكن أقفل أدور على البتاعة بتاعته وارجع
اتصل تاني...متشكرة
- يادي الكسووف فين البتاعة اللي فضيت عشان أشوف
الاسم...
- آآآآلو لقيت الاسم...فستيل... ممكن تبعتھولي لو سمحت
- حاضر يا فندم...

جودي والبتاع المدور:

- جودي... نفسي في شوية بتاع...
- بتاع ايه يا مامي
- البتاع ده اللي في التلاجة
- انه ده....
- يا جوجو البتاع ده... المدور ده...فاكهة..فاكهة.. هو فاكهة
- المدور ايه يا مامي
- يا جوجو ركزي معايا شوية بقولك البتاع المدور الفاكهة اللي
في التلاجة
- اللي هو...آآآآ مش اللمون ده....لأ
- مش اللمون
- لأ مش اللمون...و لا الزيتون... اللي هو مدور ده كده
وفاكهة يا جوجو فاكهة صغيرة كده حلوة
- العنب يا مامي؟؟

- الدرج....!!!! درج ايه يا مامي انت عايزة الدرج!!!!!!
- يوه بقي انا قصدي الكرسي..... هاتلي الكرسي بتاعه بسرعة
لو سمحت، يرووه بقي ما فيش حد فاهمني في البيت ده!!!!!!
(لكن الحمد لله اتطمنا على نفسكو يا بنات، بمجرد ما يكبر
الأولاد يبقى الوضع أحسن كتيــــــــــــر وكل حاجة بتتبط،
والباع بيختفي تدريجيًا.. وماتقلقيش حتفتكري اسمك بعدين).

حاجات غريبة جداً

فيه شوية حاجات غريبة بالنسبة لي وبالنسبة لأي ست، وعشان كده أحب أشارككم في تفكيري.. يمكن يكون عندكم إجابات للحاجات الغريبة دي.

- الحاجة الغريبة، واللي بافكر فيها والسؤال اللي بيؤرقني هو:
ان ربنا خلقنا احنا الستات احنا اللي نحمل واحنا اللي شكلنا يتغير "تغير جذري" واحنا اللي نولد ونعاني آلام الولادة واحنا اللي نرضع (الرضاعة مؤلمة على فكرة الى حد ما، وأوقات كثير الأم بيحصلها جروح قوية مدمية، عشان اللي مايعرفش، بس الأمهات بتأنس بالوجع ده طالما بتدي ابنها الحاجة الوحيدة اللي يعرف يعملها عشان يعيش وهي انه يرضع بالفطرة).

كمان احنا اللي نتخن ومانعرفش نخس، آمال انتو يا رجالة بتعانوا من ايه بالظبط واشمعنى احنا اللي نتخن..ها... اشمعنى ها... اشمعنى ى ى ى؟؟؟؟

الستات هي اللي تحمل وتولد ويحبلها بواسير وإمساك أو إسهال أو الاتنين مع بعض في نفس ذات الوقت.. واحنا اللي نرضع واحنا اللي نغير.. وبعدين احنا اللي نغسل ونرجع نأكل ونكرع ونغير.. ويحبلنا برد والحياة ماشية لأننا لازم نرضع ونغير ونحمي ونغسل وننشر ونطبخ ونعمل باقي الحاجات اللي في البيت و....

الألم اللي بيتحملة؟ مافيش حاجة، طيب شكله بيتغير... لأ... طب بيعاني من أي اوجاع حمل أو ولادة والذي منه...

برده لأ.. فتبقى "الطهارة" فعلاً بالنسبة له آخر الأحران، أنا مش باحقد عليكم يا جماعة ولا أي حاجة، حاشا وكلا، بس بصراحة بقى شوية رحمة ومودة من عندكم حرام عليكم.. ده احنا غلاية والله... اهيسىء اهيسىء

- الحاجة الغريبة قوي وطبعاً برده مالهش أي تفسير منطقي ولا غير منطقي: ان دائماً الأولوية مش للأُم في الاختيارات المهمة في الحياة مع انها اللي شايلة كل المسؤولية، وغير كده يبقى عيب ومايصحش. أوضحلكو شوية:

يعني لما تبقى الأم نفسها تفصل شوية من الدوامة دي، نفسها تنزل تشوف الشارع والناس وتسمع صوت العربيات وصوت الناس اللي عايشة غيرها في الدنيا، عشان تحس انها عايشة هي كمان، تبقى غريبة وعجيبة من عجائب الزمن....

"وهي عايزة تنزل تعمل ايه ، تقعد مع عيالها أحسن، في واحدة تنزل وتسب عيالها برده؟" #شغل_أرشانات

لأ... هو مافيش واحدة تنزل وتسب عيالها.. بس ممكن في واحدة تكتب، أو ممكن فيه واحدة أعصابها تبوظ وتتصرف مع أولادها بعصية مفرطة غير مبررة.. أو ممكن واحدة تبقى عنيفة

وتكسر نص الأطباق والكوبايات اللي في البيت على حين سهوة من غير قصد... أو ممكن واحدة تنفسن على جيرانها أو على حماها أو على قرايبها كلهم عشان كل واحدة عايشة حياتها وماحدث معبرها أو حتى مقدر وضعها #بارانويا

طيب مش الأفضل انها تفصل المود بتاعها شوية، وتحس انها عايشة وانها مش ثور في ساقية ولا جارية محبوسة بين أربع حيطان طول الوقت، والأكادة ان مافيش فارس حييجي ينقذها ولا أي حاجة؟.... أو يمكن نفسها تلغي إحساسها انها ماتفهمش حاجة غير في الغيار والي بي وبس (هي فعلاً بقت تفهم كويس في الموضوع ده بالمناسبة).

يبقى نفسها تزل لوحدها وتتخلي عن جميع المسؤوليات ولو حتى #في_خيالها_بس

تيجي واحدة أرشانة... (لأ مش حماك ولا مامتك أنا ما قلتش كده) تيجي تقولك تزلي تروحي فين يعني ولما العيال يبقوا عايزين ياكلوا ولا يغيروا مين حايأكلهم والا يغيرهم؟؟

هو بالنسبة للأب يعني، دوره بيبقى متلقي للفعل بس؟؟؟.... ما ينفعش يكون هو فاعل في بعض الأحيان؟؟؟؟!!! ولا الفعل الوحيد اللي عمله انه جاب معاها الولاد.... من المستشفى؟؟؟؟!!!

ومع ذلك، الأم عمرها ما حتزل الا لما تكون متأكدة ان ولادها لسة واكلين وانهم مغيرين ونايمين أو لسة صاحيين من النوم....

وبرده هي نفسها ذات نفسها مش من ضمن أولوياتها، لأنها
بتسحط في مواقف ما ينفعش فيها غير انها تيجي على نفسها وتنسى
نفسها خالص وتشوف الأولويات. يعني تزل هي ولا الولد يروح
تمرينه؟ تزل هي ولا البنت تروح الدرس؟ تزل هي وتسب عيد
ميلاد ابن اختها؟ والا تزل هي ولا تروح تشوف طلبات مامتها؟
تزل هي ولا يروحوا لحماقها عشان عيد الأم؟ تزل هي ولا جوزها
يروح تمرين الكورة اللي متعود عليه مع صحابه؟ تزل هي ولا تقعد
تذاكر للولاد عشان "الكويز" بكرة (ده زي التطبيق بتاع زمان
كده، بس بيبقى في كل المواد وكل الأيام) ☹

الموهبة الدفينة

حتلاقي نفسك من كتر الكبت أو الزهق أو الروتين يوم بعد يوم
بتطلعي موهبتك الدفينة اللي ربنا خلقها جواكي وانت مش عارفة،
أو اللي كان عندك فضول ناحيتها ومش مركزة فيها، أو اللي كانت
بتلفت نظرك طول العمر وما عندكيش الجرأة انك تقولي " أنا بحب
الحاجة دي وعازية أتعلمها وأطور نفسي فيها " بس انت لاحظي
نفسك كده كويس....

ايه اللي بتحييه وتلاقي نفسك بتتشدي ناحيته؟ لأ طبعا مش
الأكل... ده مش موهبة خالص... ده... ده... ايه رجة المحشي دي
يا ولاد... يوووه جوعتوني

لا لا لأ الموهبة اللي أقصدها انك تلاقي نفسك بتحيي عملي
حاجة، وتلاقي نفسك بتبرعي فيها، وكنت ناسية الموضوع ده من
زمان، أو مش عارفاه واكتشفت نفسك فجأة.. ممكن تكون انك
ترسمي أو عملي كروشييه أو تريكو، أو تقصي وتخيطي عرايس قماش
مثلا، أو تطبخي الأكلات اللي بتحييها. وطبعا مافيش وقت عملي
أي حاجة من دي خالص، لكن زي ما يكون لازم عملي كده،
عشان محك مايلسعش...

لازم عملي كده، عشان بتدوري على نفسك ومش لاقياها...
لازم عملي كده، عشان انت مش عارفة مين اللي بتقابلك كل
يوم في المراية...

هي آه موهبة بتطخن، بس ولو، مش قادرة ايني ابطل امسك
الدقيق في ايدي، باحس كل كام يوم ايني لازم اعمل حاجة بالدقيق
والبيض واللبن والزبدة، اعمل كيك أو كب كيك أو عجينة فطيرات
أو عجينة بسكويت أو عيش، أي نوع من العجن، المهم أعجن
يايدي. أنا بحب العجينة نفسها وبحب ريحة الحميرة، والحمد لله بقيت
متمكنة في كل الأنواع دي، بس البسكويت لسة شوية ربنا يسهل
بقي.. ماتقلقوش قريب ان شاء الله حاتقنه بس الولاد يكبروا شوية
كده... ويشدوا حيلهم... ويدخلوا الجامعة... ويتجوزوا و....هو أنا
كنت بأقول إيه....؟

آه بحب أعمل حلويات، وطبعًا بحب أكل اللي عملته، بس ده
مش موضوعنا أنا باتكلم على العمائل نفسها...

و... آآآحأ أشكر الست الوالدة على تشجيعي ودفعي في هذا
الاتجاه وآآآآآآآآآ آحأ أهديها اغنية #ست الحبايب يا... يا ضناية
انت.

أول مرة

بعد الولادة...

أول مرة بعد الولادة أعمل حاجات ما كنتش قادرة أعملها طول الوقت وأنا حامل، كانت ليها فرحة كبرى، يعني مثلاً:

- أول مرة أحس إني باتنفس بجد وما فيش حاجة حايشة نفسي كانت بعد الولادة بكام ساعة.

- أول مرة أحاول ألبس لبسي العادي اللي كنت بالبيه قبل الحمل كان بعد الولادة بأسبوعين وأنا قلت " أحاول البس " لأنه برده ما دخلش فيا ☺

- أول مرة ألبس البنطلون الجير اللي بحبه ويدخل فعلاً كان بعد الولادة بشهر، بغض النظر انه ما تقفلش واني لبسته بالعافية مش مهم بس كانت الفرحة الكبيرة وأنا شايفة نفسي لابساه.

- أول مرة أقدر اوطي فيها لقدام وارجع تاني مش فاكدة امتى بس دي لحظة تستحق الذكر.

- أول مرة أشوف رجلي زي ما كانت قبل الحمل مش واردة

وكل

رجل اتنين كيلو.

- أول مرة اقدر اتقلب فيها على السرير وأنا نائمة من غير مساعدة ومن غير مخدات ومن غير ما نفسي يروح، لأ والأحلى بقى اني اقدر انام على بطني بكل حرية، من غير ما اكون قلقانة على ايد الجونين والا رجليه.

- أول مرة اقدر احضن أولادي وهما يحضنوني من غير نتوءات ودورانات مالهش تفسير من كل ناحية، انا فرحت وهما كمان فرحوا.

- اول مرة أكون قرية منه وهو برده قريب مني وشامة ربحته مالية عليا كل كيان....

ايوة طبعاً طبق الأكل على الترابيزة، وانا حامل الترابيزة كانت
تبقى بعيدة جداً والطبق بعيداً، اول مرة اقعد فيها
على الترابيزة ويبقى الطبق قدامي على طول واقدر أكل بحرية من
غير ما يقع نص الأكل من المعلقة عقبال ما يوصللي دي كانت فرحة
بالنسبة لي ولقيت نفسي بابتسم للطبق اللي قدامي وعازية أخذه
بالحضن:

- اول مرة اقدر اقعد على رجلي وانا تانيها، وتكون فعلاً انت، بغض النظر برده انما وجعتني جداً وحسيت ان عمري سبعين سنة ونص، وماعرفتش اقوم غير بمساعدة صديق، بس مش مهم ده كله، عشان برده كانت ليها فرحة كبيرة وحسيت اني بني آدمة عادية زي باقي البني آدمين اللي ممكن يقعدوا تانيين رجليهم وممكن توجعهم برده.... عادي يعني....

- أول مرة أقدر أتوضأ فيها على الحوض زي ما كنت بأتوضأ قبل الحمل، وأرفع رجلي على الحوض وأحس ابي رشيقة 😊... أنا رشيقة يا ولاد، أنا رشيقة..... آآآي وتحت.

- أول مرة أقدر أخط اللاب توب على حجري وأكتب وأقرأ
وأعمل شغلي من غير قلق واتني رجلي واللابتوب على حجري برده
كان ليها فرحة لازم اذكرها.

- أول مرة أشيل ابني في ايدي بعد الولادة لحظة مالهش وصف
بالكلمات، وعشان كده أنا مش هاوصفها (هي هي هي) ولكنها
لحظة لازم تذكر.

- وأول مرة أسجد فيها وأكون قرية من ري، وأحس ان ربنا
سامعني وقريب مني وانا بادعيه يحميلي أولادي ويحافظ عليهم
ويساعدني ويهديني في تربيتهم.

الفهرس

٥

المقدمة

قبل الولادة

١١

النفس

١٦

النوم

٢١

البي بي

٢٥

الجوع

٣٢

الكورة

٣٦

أوقاااات

٤٢

الولادة: كلايت أول مرة

٤٦

الولادة... كلايت ثاني مرة:

٥٨

النوم بعد الولادة

٦٦

اللي بعد البيرونة

٦٩

التيتينة

٧٠	الغيار
٧٢	زي الناس؟؟؟
٧٦	البتاع:
٨١	حاجات غريبة جدًا
٨٦	الموهبة الدفينة
٨٩	أول مرة